

# LIZARRA

Nere atariko lizar eder,  
Zutzaz itz neurketan asi nai det.  
Txoragarri ez ba'ziña  
Zerk legike zuk egiña?

Ni baño zerbait zarrago zera;  
Elkarri-so, sarri egon gera.  
Nik zugandik ikasiya  
Iñolaz ez da ttikiya.

Sarigarri zu. Zer emango nik?  
Gutxitan det izan ezer onik.  
Nere ezagunak, agiyan,  
Ba-dute zuretzako lan.

\* \* \*

Pozik yai aundiz eusko-segari:  
Txapeldun dezu, eskuan sari.  
Esku-lekua egingo,  
Ark zu ospez yasotzeko.

Eztayetan gurdiya txit arro:  
Bizitzekoz betea oparo.  
Zugandik gurdi-sayetsa  
Iñork atera al ba'leza!!!

Yauntxo artean maya txit txuri:  
Yanari goxoz ain dago guri!!  
Zuri kendutako zurez  
Zergatik mai bat egin ez?

Amak an aurtxo magalean:  
Lo ar-erazten egiñalean...  
Zutzaz seaska egiñen  
Aurra ipintzeko laisterren.

\* \* \*

Ayek orrela. Ez naiz ni bete.  
Nik ainbatean nork zaitu maite?  
Neguan, begi beltz, lerden  
Nai zaitut, beti eta aurtzen.

Zuganuntz, udaberriz, karnaba,  
Kabiya zuzentzen. Ba-du yana...  
Arek abes. Ni itzalean  
Lo-kuluxka ederrean.

Mutiko etxera ikastetxetik:  
Zuk adarrak izerdiz beterik.  
Txilibitu egingo du,  
Etxe inguruak alaitu.

Yon Ukuzlea gaur da yayoko:  
Zure adarrez ate eta leyo  
Nork ez ditu apainduko,  
Deun aundiya ospatzeko?

Udarako igande arratsaldez,  
Aitonak aurtxo asko ipui galdez:  
Zure azpin ark yalkiko,  
Eder-gura ayei sartuko...

Laister negua. Ardi yanari,  
Artzayak, lizar-kimuz, ugari...  
Adarrak makil dauzkazu:  
Etsaya yoko al dezu?

Len bai ayen aurka gure aitak  
Ikus ditugu. Lizar makillak  
Izkillu; eta, bulartsu  
Azkatasun eskuratu.

Olerkari eta neurtitzlari,  
Zugana zeuden biziro adi.  
Goien izar... ibaitxoan  
Zure itzal zuten gogoan.

Neronek ere, lenen Yinkoa;  
Bigarren dizut zure oroitza.  
Piztu didazu sarritan,  
Su berexia muinetan.

Eusko olerkarien baratzatxo,  
Oraindik be aukeran landertxo...  
Zuspertzalle zinduzkegu,  
Bat egiten ba'genkigu.

Nere altxorra erakutsi det:  
Agiriyan dago apain eder.  
Zarren gogoia berritu:  
Berorrek nauka gogotsu.

Etxeberria'tar PRANTZISKO

# SAN JOSE - LOREA

San Jose-lorea  
ori... ori...  
Pitxi politik nai?  
Orra... tori!

\* \* \*

San Jose-lorea,  
negu-lore...  
Eguzkiren sua  
du kolore!

\* \* \*

San Jose-lorea,  
an, or pilla...  
Neguan besterik  
ezin billa.

\* \* \*

San Jose-lorea,  
ixil mintzo:  
Gora, gora biotz;  
gora, zintzo!

\* \* \*

San Jose-lorea,  
Negua... otz!  
Bean otza degu;  
gora biotz!

ZUGASTI

## GAZI-GEZAK

Zure begi, ille ta arima  
Margo batekoak dira.  
Bai, margo beltz batekoak dira  
Zure begi, ille ta arima.

\* \* \*

Zure ao ta ezpañetan  
Gezurra da guzia:  
Itzak,  
Farra,  
Margo gorria...  
Zure ao ta ezpañetan  
Gezurra da guzia.

\* \* \*

Zure begi beltz ederrak  
Zeruko izar bi dira.  
Eta zure aurpegia berriz...  
Zerua ber-bera.

URREA